



Inatsisartunut ilaasortaq
Jens Napātōk', Naleraq
/Maani

Imermik pilersuineq pillugu § 37 naapertorlugu apeqquteqaat nr. 122-2023- mut akissut

Allakkat ulluat: 03-08-2023
Suliat normua.: 2023 - 3743
Allagaatip ilisarnaataa:
23230492

Asasara Jens Napātōk'

Postboks 1614
3900 Nuuk
Oqarasuaat.: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Inatsisartut suleriaasianni § 37, imm. 1 naapertorlugu imermik pilersuineq
pillugu Naalakkersuisunut apeqquteqaateqarput.
Apeqqutit uannit akisassanngorlugit innersuunneqarput.

Matuma kinguliani apeqqutit ataasiakkaarlugit issuarneqarput, akissuteqaammik
malitseqartinneqarlutik.

1. Qassit soorlu Ittoqqortoormiuniittutut ittumik ukiumi imermut peqqumaasivimmik atorfissaqartitsippat?

Akissut:

Akissuteqarnissamut Nukissiorfiit ilanngussitinneqarput, imatullu
ilisimatitsipput:

*"Nukissiorfinniit sumiiffinni pilersuiffiusuni ukiumi imermik peqqumaasivinnik
pisariaqartitsinerit ingerlaavartumik naliliiffigineqartarput. Ukiumi imermik
peqqumaasivinnik pisariaqartitsinernut piumasaqarneq apeqqutaasarpoq,
suliallu Nukissiorfinnit pilersaarutaasut saniatigut allanik
pisariaqartitsisoqarnerisooq naliliiffigineqartanngilaq. Allannqortoqartillugu,
soorlu innuttaasut amerlinerini imaluunniit aalisakkerivinnik assigisaannillu
pilersitsisoqartillugu imermut peqqumaasivinnik pisariaqartitsinerit
naliliiffigeqqinneqartarput."*

2. Imermut peqqumaasivittaarnissaq Qaanaami pilersinneqarpat qanoq akeqassava tamanna?

Akissut:

Akissuteqarnissamut Nukissiorfiit ilanngussitinneqarput, imatullu
ilisimatitsipput:

*"Qaanaami imermut peqqumaasivittaarnissamut akiusumut pissutsit arlallit
apeqqutaasarput, taakkunungalu entreprenøreqarneq, peqqumaasiviup
inissiffissaanut ruujorilersuineq il.il. ilaatinneqarput. Taamaattumik
tamatumunnga aalajangersimasumik akissuteqartoqassappat, paasissutissat*

amerlanerusut, kiisalu taakku misissorneqarnissaat pisariaqartinneqartussaapput. Kisiannili maannarpiaq naliliineq malillugu Qaanaami imermut peqqumaasivinnik amerlanerusunik pisariaqartitsisoqannngilaq. Qanittukkut imermut peqqumaasivik 5000 m³-nik imaqarsinnaasoo ikkunneqartoq, siorna (2022) aasakkut atulersooq 30 mio.koruuninik akeqarpoq. Taassuma saniatigut imermut peqqumaasiviit 2 x 2000 m³-t pigineqarput, taassumalu aappa tamakkiisumik iluarsaanneqaleruttorpoq. Tassalu Qaanaami imermut peqqumaasiviit katillugit 9000 m³-nik imaqarsinnaasut pigineqarput, aammalu naliliineq malillugu maannarpiaq annertunerusunik pisariaqartitsisoqannngilaq.”

3. Kangersuatsiami ukiumi imeq pisariaqartitaq pissarsiariniarlugu imermut peqqumaasivik pilersinneqassappat qanoq akeqassava?

Akissut:

Akissuteqarnissamut Nukissiorfiit ilanngussitinneqarput, imatullu ilisimatitsipput:

”Imermut peqqumaasivimmik ikkussinissamut pissutsit assigiinnngitsut apeqqutaapput. Misilittakkat malillugit ikkussinissamut aningaasartuutit 1 m³-mut aningaasartuutit 5.000 – 10.000 DKK-nik amerlassuseqartarput, amerlanertigullu peqqumaasiviit 2.000 – 5.000 m³-it pigineqartarput. Aalajangersimalluinnartumik oqaatigalugu peqqumaasiviup angissusissaanut najukkami pissutsit pisariaqartitallu apeqqutaasarput. Kangersuatsiami imeq tunisassiassaq immamiit pissarsiarineqartarmat, imerlu tarajuiat atorlugu salinneqartarmat, imermut peqqumaasivimmik sananissaq isumaqartussaannngilaq, taanna immap erngani immerneqartartussaassammat. Tamatuma saniatigut imermut akuariikkamut peqqumaasiviliinissaq orniginannngilaq, imeq uninngaannartoq erngup imerneqarsinnaasup pitsaassusianik ajorseriartitsisinnaammat.”

4. Imermut peqqumaasivimmik pisariaqartitsineq sumi pisariaqartinneqarnerpaava?

Akissut:

Akissuteqarnissamut Nukissiorfiit ilanngussitinneqarput, imatullu ilisimatitsipput:

”Oqaatigineqareersutut Qaanaami imermut peqqumaasiviit marluusut, 2000 m³-nik imaqarsinnaasut aappaa tamakkiisumik iluarsaanneqarnera Nukissiorfinnit sulissutigineqarpoq. Maannarpiaq sumiiffinni pilersuiffiusuni imermut peqqumaasiviit ilanissaannut pisariaqartitsisoqannngitsoq naliliisoqarpoq. Sumi imermut peqqumaasivinnik pisariaqartitsisoqarnerpaanernik naliliinissamut piumasaqassuseq apeqqutaasussaavoq. Illoqarfimmi/nunaqarfimmi innuttaasut amerlippata, imaluunniit assersuutigalugu tunisassiorfimmik imermik annertuumik atuisumik pilersitsisoqarpat, imermut peqqumaasivinnik pisariaqartitsineq

naliliiffigeqqinneqassaaq. Nukissiorfiit imermut peqqumaasivinnik sumiiffinnut pisariaqartitsiffiusutut naliliiffigineqartunut ikkussuisarpoq.”

5. Naajaat aammalu Innarsuit nunatsinni kisimik imilianik imertarfiusinnaasunik kisimik amigaateqarput, qanoq taakkua pisaartinneqarpata taamaattunik akeqassappat?

Akissut:

Akissuteqarnissamut Nukissiorfiit ilanngussitinneqarput, imatullu ilisimatitsipput:

”Naajaani imilerveqanngimmat ullumikkutut imertartarfimmik sananissaq isumaqartussaannilaq. Tamanna pissappat imilervimmik, imermik tunisassiassamik milluaavimmik il.il. sanasoqaqqaartussaavoq. Nunaqarfinnut imilerveeraq 8 – 10 mio. koruunit missaannik akeqartarpoq. Imertartarfik sananeqassappat illutaannaa 100.000 koruunit missaannik akeqartussaavoq..

Ullumikkut Innaarsunni imertartarfiit marluupput.”

Neriuppunga matuma siuliani apeqqutitit akineqartut.

Inussiarnersumik inuulluaqqusillunga

Kalistat Lund